

Košarkaši Sparsa slavili na Pecari i povelili u finalnoj seriji protiv Širokog 2:1



Košarkaši Širokog Brijega i Sparsa su nam podarili još jednu odličnu utakmicu u finalnoj seriji play-offa Prvenstva Bosne i Hercegovine.



U trećoj utakmici serije, koja je odigrana večeras na Pecari, u velikoj drami su slavili gostujući košarkaši sa 80:84.

Ponovo smo od početka gledali veliku borbu ova dva tima, a prva dionica je bila dosta neefikasna, pa je završila 13:12 u korist Širokog.

U drugoj četvrtini su se probudili šuteri na obje strane, pa smo gledali fantastičnu košarku. Nešto je bolji ponovo bio Široki, koji je na odmor otišao sa prednošću od 4 poena (42:38).

Sparsi su pojačali u nastavku te u trećoj dionici smanjuju prednost domaćih na svega dva poena, a zatim se ušlo u dramatičnu završnicu, a atmosferu je dodatno podgrijala mnogobrojna publika u dvorani Pecara.

Sarajevski tim na dvije minute do kraja dolazi do poravnania i rezultata 74:74. Nakon toga Bajramović preuzima odgovornost, te svojim koševima donosi prednost Sparsima u finišu.

S druge strane je Mateo Drežnjak održavao Široki, ali je zatim Filipović u ključnim trenucima promašio slobodno bacanje, te su Sparsi na 20 sekundi do kraja imali poen viška.

Ponovo je Filipović nakon toga išao na liniju za slobodna bacanja, bilo je to na 11 sekundi do kraja, a i ovaj put je bio na 1/2.

Kaznio je to na kraju Kenan Bajramović fantastičnom trojkom u posljednjim sekundama susreta. Sparsi će tako na Grbavici imati meč loptu za svoj prvi naslov prvaka Bosne i Hercegovine. (Scsport, tl)

Date: 23-05-2019